

cium, & seipsum repugnantibus erroribus euertit. Quo verò tempore, quòue primùm authore cœperit, non reperit Augustinus, sed nec Philaster ipse cōmemorauit. Quidam à Seueritis & Armeniis hæreticis profectum hunc errorem putant. Alij ex Nicephoro à Petro Gnapheo, libro 15. cap. 28. sed falluntur magna temporum ignorantia. Vixerunt enim hi omnes aliquot post Eutychem hæreticum seculis, à quo sua deliria sumpserunt illi. Eutyches autem ipse post defunctum Augustinum, qui hunc errorem iam pullulantem viderat, natus est, vt manifestissimè ratio temporis istorum sententiæ repugnet. Quantum verò conicere potui, præsertim ex tertio Theodoretì dialogo, qui dicitur Impatibilis, temporibus Appollinaris, & Eusebij Emiseni fabricari & spargi cœpit, sub Constantio, Constantini Magni filio, & Iulio Romano episcopo, vt docet Socrates libro 2. circa annum à Christo passo 311. Durauit autem diutissimè. Sustentata enim est hæc hæresis ab Eutychanis, & ab iis pertinaciter defensa, maximè verò à Petro Gnapheo sub Zenone imperatore, & nunc quoque inter Armenios, qui se Christianos appellant, permansisse fertur. Grassata verò est in Asia, & Syria Orientali præcipuè, vt quanuis initio paruus error videretur, successu temporis, atque obstinationis accessione, grauissimus postea factus est, tanti est nimirum, vel latum quidem vnguem à vera de Christi duabus naturis fide discedere, seque tetrìs istis erroribus micipare.

CAP. LXIII.

Triformii & Tritheitæ quid senserint.